

# REGLUR

## fyrir Kirkjugarða Reykjavíkurprófastsdæma.

### Skilgreining.

#### 1. gr.

Kirkjugarðar Reykjavíkurprófastsdæma er sjálfseignarstofnun með sérstöku fjárhaldi, sem lýtur stjórn sem kjörin er samkvæmt 4. gr. og nefnist kirkjugarðsstjórn.

Kirkjugarðar Reykjavíkurprófastsdæma lúta yfirstjórn prófaste og biskups.

### Helstu verkefni kirkjugarðsstjórnar.

#### 2. gr.

Kirkjugarðsstjórn hefur m.a. á hendi umsjón og fjárhald kirkjugarða Reykjavíkurprófastsdæma, sér um framkvæmd grafartöku og árlegt viðhald legstaða og annast greiðslu kostnaðar af prestþjónustu vegna útfara og aðra lögboðna starfsemi.

Um nánari útfærslu á lögboðnum verkefnum Kirkjugarða Reykjavíkurprófastsdæma, fer eftir fyrirmælum í lögum og þeim reglugerðum sem settar kunna að verða samkvæmt þeim.

Kirkjugarðsstjórn er heimilt að reka útfaraþjónustu og skal sú starfssemi og fjárhagur henni tengdur vera algerlega aðskilin frá lögboðnum verkefnum kirkjugarðsstjórnar og verkefnum sem henni er heimilt að takast á hendur samkvæmt lögum.

Kirkjugarðsstjórn er heimilt að fela sérstakri framkvæmdastjórn að annast þau verkefni sem tilgreind eru í reglum þessum. Um skipan framkvæmdastjórnar fer samkvæmt 8. gr.

### Kapella, líkhús og aðstaða starfsmanna.

#### 3. gr.

Kirkjugarðsstjórn skal kosta og annast rekstur kapelli og líkhúss við þá kirkjugarða, sem þörf er á. Heimilt er og að koma upp húsnaðisaðstöðu fyrir starfsmenn kirkjugarðanna.

### Skipan kirkjugarðsstjórnar.

#### 4. gr.

Kirkjugarðsstjórn skal skipuð með eftirfarandi hætti:

- A. Einn fulltrúi og einn til vara skal kosinn af hverri sóknarnefnd úr hópi aðal- og varamanna í nefndinni og skal kosningin vera til fjögurra ára í senn.
- B. Einn fulltrúi og einn til vara skal kosinn til jafn langs tíma af hverjum utanþjóðkirkjusöfnuði, sem hefur a.m.k. 1.500 gjaldskylda meðlimi. Fulltrúum kirkjudeilda sem hafa færri en 1.500 gjaldskylda meðlimi skal boðið til samráðsfundar einu sinni á ári.
- C. Bálfararfélag Íslands kýs, ef því er að skipta, einn fulltrúa í kirkjugarðsstjórn og einn til vara til fjögurra ára.
- D. Prófastar í Reykjavíkurprófastsumdæmum sitja fundi hvor sitt árið og er hinn þá vara- maður. Þeir hafa atkvæðisrétt, þegar tala fundarmanna er jöfn.

### Ráðning forstjóra, verkefni hans og kjör.

#### 5. gr.

Kirkjugarðsstjórn ræður forstjóra, sem sér um daglegan rekstur kirkjugarðanna, annast ráðningu lausráðins starfsfólks og sér um framkvæmdir í samráði við framkvæmdastjórn, samkvæmt erindisbréfi sem kirkjugarðsstjórn setur.

Kirkjugarðsstjórn semur um ráðningarkjör og önnur starfskjör við forstjóra.

**Tilkynningar um fulltrúa í kirkjugarðsstjórn, fundarboð o.fl.**

## 6. gr.

Sóknamefndum, utanþjóðkirkjusöfnuðum og Bálfararfélagi Íslands, ef því er að skipta, ber að tilkynna skriflega til forstjóra Kirkjugarða Reykjavíkurprófastsdæma, fyrir hönd kirkjugarðsstjórnar, hverjir verði aðal- og varamenn í kirkjugarðsstjórn strax og kosning þeirra hefur farið fram. Í tilkynningu skal greina nafn viðkomandi, heimilisfang og símanúmer, svo og hvert eigi að beina fundarboði, sé það ekki til heimilis viðkomandi.

Boðun á fundi í kirkjugarðsstjórn telst réttilega send og fram komin, sé hún send með sannanlegum hætti og nægilegum fyrirvara, til þess staðar, sem tilkynntur hefur verið fyrir hvern aðalmann samkvæmt því sem segir í 1. mgr.

Ef aðalmaður forfallast eftir að hann hefur fengið fundarboð, ábyrgist hann að varamaður verði boðaður í sinn stað.

Sjái aðalmaður fram á forföll af sinni hálfu, t.d. vegna fjarvista eða veikinda getur hann tilkynnt það fyrirfram til forstjóra að hann geti ekki sótt fundi í kirkjugarðsstjórn tiltekið tímabil og óskað þess að fundarboði verði beint til varamanns síns. Ber þá kirkjugarðsstjórn ábyrgð á boðun varamanns.

**Fundir kirkjugarðsstjórnar.**

## 7. gr.

Kirkjugarðsstjórn heldur fundi, svo oft sem þurfa þykir.

Halda skal fund í kirkjugarðsstjórn óski helmingur eða fleiri fulltrúar eftir því skriflega við formann.

Aðalfund kirkjugarðsstjórnar skal halda eigi síðar en í maímánuði ár hvert og skulu þar teknir fyrir eftirtaldir dagskrárliðir:

1. Skýrsla formanns um starfsemina á næstliðnu ári.
2. Endurskoðaðir reikningar um tekjur og gjöld og um efnahag Kirkjugarða Reykjavíkurprófastsdæma skýrðir og lagðir fram til samþykktar.
3. Skýrsla um starfsemi útfararþjónustu.
4. Endurskoðaðir reikningar um tekjur og gjöld og um efnahag útfararþjónustu skýrðir og lagðir fram til samþykktar.
5. Kosning í framkvæmdastjórn útfararþjónustu, ef við á.
6. Ákvörðun á þöknun fyrir setu í framkvæmdastjórn Kirkjugarða Reykjavíkurprófastsdæma og fyrir setu í framkvæmdastjórn útfararþjónustu.
7. Kosning formanns og varaformanns kirkjugarðsstjórnar, þegar við á, til fjögurra ára.
8. Kosning eins meðstjórnanda og tveggja til vara í framkvæmdastjórn þegar við á.
9. Kosning tveggja skoðunarmanna reikninga Kirkjugarða Reykjavíkurprófastsdæma og útfararþjónustu.
10. Ákvörðun um framlag í Kirkjubýggingasjóð.
11. Önnur mál, löglega fram borin.

Endurskoðaðir reikningar samkvæmt 2. og 4. tl. skulu sendir fundarmönnum með aðalfundarboði.

Boða skal aðalfund með 10 daga fyrirvara, en aðra fundi með minnst viku fyrirvara.

**Framkvæmdastjórn.**

## 8. gr.

Kirkjugarðsstjórn skal á aðalfundi kjósa úr sínum hópi einn mann í framkvæmdastjórn og tvo til vara. Kosningin er til fjögurra ára. Framkvæmdastjórn annast þau verkefni, í umboði og á ábyrgð kirkjugarðsstjórnar, sem henni eru fengin með reglum þessum.

Formaður kirkjugarðsstjórnar og varaformaður skulu eiga sæti í framkvæmdastjórn, án sérstakrar kosningar og skal formaður jafnframt vera formaður framkvæmdastjórnar.

Kirkjugarðsstjórn ákveður þóknun til þeirra, sem sitja í framkvæmdastjórn.

**Helstu verkefni framkvæmdastjórnar.**

## 9. gr.

Framkvæmdastjórn fer í umboði kirkjugarðsstjórnar með stjórn og umsjón með öllum rekstri Kirkjugarða Reykjavíkurprófastsdæma. Hún gerir í lok hvers árs áætlun um tekjur og gjöld kirkjugarðanna fyrir næsta ár.

Framkvæmdastjórn ber ábyrgð á því, að saminn sé reikningur um tekjur og gjöld næstliðs árs og efnahagsreikningur, sem lagður skal fyrir aðalfund.

Ársreikningar skulu endurskoðaðir af löggiltum endurskoðanda.

Kjósa skal skoðunarmenn reikninga úr hópi stjórnarmanna í kirkjugarðsstjórn og skal þeim heimill allur aðgangur að bókhaldi og fylgiskjölum.

Framkvæmdastjórn skal, í umboði kirkjugarðsstjórnar, annast um að endurskoðaðir reikningar séu sendir Ríkisendurskoðun fyrir 1. júní ár hvert fyrir næstliðið ár. Jafnframt skal sveitarstjórnnum þeim sem standa að Reykjavíkurprófastsdæmum sendir ársreikningar.

## 10. gr.

Framkvæmdastjórn ræður fasta starfsmenn í samráði við forstjóra og setur þeim erindisbréf, eða semur fyrir þá starfslýsingu.

Ef ágreiningur verður í framkvæmdastjórn um ráðningu í stjórnunarstöðu, skal skjóta máli til kirkjugarðsstjórnar til endanlegrar úrlausnar. Um ráðningu annarra fastra starfsmanna skal meiri hluti framkvæmdastjórnar ráða.

**Fundir framkvæmdastjórnar.**

## 11. gr.

Framkvæmdastjórn heldur fundi mánaðarlega eða oftár ef þurfa þykir.

Halda skal fundi í framkvæmdastjórn ef formaður ákveður, eða ef tveir aðrir framkvæmdastjórnarmenn eða forstjóri krefjast þess.

Formaður boðar til fundar í framkvæmdastjórn, eða forstjóri í umboði hans, og skal boða fund með a.m.k. sólarhringsfyrirvara.

Forstjóri situr fundi framkvæmdastjórnar og undirbýr þá.

**Útfararþjónusta.**

## 12. gr.

Kirkjugarðsstjórn skal heimilt að setja á stofn og annast rekstur á útfararþjónustu í því formi sem lög leyfa, enda fái til þess leyfi dóms- og kirkjumálaráðherra.

Hafa skal rekstur útfararþjónustu og fjárhag henni tengdan algerlega aðskilinn frá starfsemi, sem telst til lögboðinna verka kirkjugarðsstjórnar.

**Reglur um starfsemi útfararþjónustu.**

13. gr.

Kirkjugarðsstjórn skal samhliða ákvörðun um rekstur útfararþjónustu setja slíkri starfsemi reglur um framkvæmdastjórn, starfsfólk, verkefni, markmið um arðsemi rekstrar, reikningsskil o.fl. og skulu þær reglur bornar upp til samþykktar á fundi í kirkjugarðsstjórn.

**Reikningsskil fyrir útfararþjónustu.**

14. gr.

Gera skal sérstakan ársreikning um rekstur og efnahag útfararþjónustu og skal sá reikningur endurskoðaður af löggiltum endurskoðanda.

Reikningurinn skal að lokinni endurskoðun sendur Ríkisendurskoðun fyrir 1. júní ár hvert fyrir næstliðið ár.

**Lagagrundvöllur - gildistaka.**

15. gr.

Reglur þessar sem samdar eru af kirkjugarðsstjórn Kirkjugarða Reykjavíkurprófasts-dæma á grundvelli 51. gr. laga 36/1993 um kirkjugarða, greftrun og líkbrennslu staðfestast hér með til að öðlast gildi þegar í stað.

*Dóms- og kirkjumálaráðuneytið, 19. apríl 1995.*

**Þorsteinn Pálsson.**

---

*Hjalti Zóphóníasson.*

**AUGLÝSING****um friðun æðarvarps og sellátra í Dalasýslu.**

Samkvæmt ákvæðum laga um vernd, friðun og veiðar á villtum fuglum og villtum spendýrum, nr. 64/1994, er hér með ákveðin friðlýsing alls æðarvarps innan marka Dalasýslu, á sama hátt og gert var árlega á manntalsþingum í hverjum hreppi frá fornu fari.

Jafnframt er friðlýst lögnum, sellátrum og varplöndum öllum með skírskotan til 15. gr. tilskipunar um veiði við Ísland frá 20. júní 1849.

Skrá um friðlýst æðarvörp og frekari upplýsingar um ofangreind málefni eru fyrir hendi á skrifstofu embættisins.

*Sýslumaðurinn í Búðardal, 12. apríl 1995.*

**Ólafur Stefán Sigurðsson.**